

# Fastnacht 1925

## Märtplatz-Schnuggerli.

„Alt Baggfisch-Clique“



### Schnitzelbank

1. Ihr liebe Lyt, jetz basset uff,  
Der kennet ebbis heere:  
Mir Märtplatz-Wyber hänn e Fraid  
am Rätsche-n-und am Schneere!  
Wär's ganz Johr uff em Märtplatz schoht,  
heert allerhand fir Sache —  
Drum wänn mir au uus unserem Härz  
kai Medergruebe mache.
2. Schynt's lyde stargg an Greessewahn  
die Trämmer und dä Wage!  
'z Sant Jakob het's am Viadukt  
däm Durm der Grind y'gschlage!  
Wär zueschnäll obenuuse will  
uff exponiertem Boschte  
(— und wär's au e Regierigsroot —),  
däm ka's der Schädel koschte!
- 3 Wenn du uf unserer Wettschtaibrugg  
zufellig grad muesch dure,  
so lueg au unseri Drache-n-a:  
si mache beesi Schnure.  
Nit minder beesi mache d'Lyt —  
's Rächtsgoh druggt uff der Mage,  
Ob d'Schugger allewyl richtig gehn,  
kennt uns der Käumlen sage!
4. D'Kanone-n-am Santjakobslescht,  
die lyde-n-an der Schnaigge:  
Si klepfe kuum meh halb so schtark  
und dien zuem Dail gar schtreike!  
E Kanonier mult mit sim Gschitz,  
das losst sich's nit verdriesse  
und salt: „Wo so viel Schwyzer? sinn,  
do kan y nimme schiesse!“
5. E Flugmeeting z'Birsfælde-n-uss  
Dien d'Grossreet arrangschiere:  
Im Häzlefragg und Schturzhelm uff,  
so dien si dert kutschiere.  
Die Hooseputzete — o y dangg —  
die mecht y nit erläbe:  
Jetz muess's aim nimme wundernäh,  
wenn si am Sässel kläbe!
6. „Faire l'Amour“ — das isch e dyri Sach  
fir mänger junge Bängel,  
und näbscht em Labhardt macht's au sunscht  
Moläschte mängem Aengel.  
Der Spälti isch ihr Schutzpatron  
und kämt sy Asicht dure,  
so gäbt's in mänger Fraktion  
nit sovyll dummi Schnurre!
7. D'Miss Mortis het am Schprung e Fraid —  
Do kunnt e saubleed Gfasel  
vo unserer liebe-n- Obrikait:  
dä Schprung syg nyt fir Basel!  
Mäng andere Schprung wird duldet do,  
wo sicher nit am Ort isch —  
und d'Polizei het au dra Fraid,  
genau so wie d'Miss Mortis!
8. 's Franzosegäld isch ordlig hoch,  
und 's Reise noch Milhuuse  
isch unkommod — 's zieht vor,  
vo jetz ab z'Basel z'pfuuse!  
Will 's Nachtigalle, d'Erle -n-und  
au d'Schtaineschanz kuum gniege,  
isch's guet, ass mit der Solitud  
mir none Pflanzplätz griege!